

cem & septem, conjuratorum principes ea nocte fere omnes in potestatem Patrum redacti, ac sceleris convicti, ad unum suspendio necati sunt, recte ex ipsis columnis superiore parte curiæ demissi. Ferunt in his fuisse Philippum Calendarium, statuarium & architectum ea tempestate clarum: quippe cujus opera Patres in publicis uti consuevissent ædificiis. Hujus creditur esse, quicquid recentiorum operum, quæ veteribus longe præstant, quæque tota fere curia ac foro hodie visuntur. Reticuissimè ejus quoque nomen, nisi inhumanum visum esset, illius ingenium (quod omnino præstans alioquin fuisse traditur) propria laude fraudare. Nam quod ad ipsum scelus attinet, tantum abest ut nefanda conjuratorum nomina aliquo modo relaturus sim, ut parum considerate eos fecisse existimem, qui in illis referendis maxime sunt occupati, qui cum illis se injuriam facere credant, ab oblivionis injuria vendicant. Nemo non, quamvis scelestus, quoquo modo possit id fieri, suum vellet nomen posteritati commendari. Memoriam proditum est, ignotum olim hominem Dianæ Ephesiæ templum de industria concremasse: qui postea sceleris convictus, quum rogaretur quo consilio id fecisset, respondisse dicitur, ut scelere aliquo atrocissimo, quia virtute non posset, sibi nomen compararet. Ferunt, tum ad illius memoriam abolendam lege cautum, ne quis illius nomen in annalibus aut historia referret. Merito quidem ac prudenter; atrocius namque supplicium fuit, ejus memoriam, quam vitam abolere. Quanquam nostros quoque domestica exempla sui officii admonere potuissent. Tepulana conjuratione decreto Patrum cautum est, ne quis Bajamontis aut cujuspiam conjuratorum signa in albo aliave materia referret. Quid quod quum omnium Principum imagines ab initio urbis ad hæc tempora in comitio referendas majores censuissent, ne Phalerii perniciosi Principis imago in tanta majestate Ducum conspiceretur, thronum vacuum nigro velo opertum figurari voluerunt. Viderunt & ipsi, eos qui de Republica male meriti essent, nullo majore supplicio

1355

*Inter conspirantes
Calendarius archi-
tectus nobilissimus.*

Ceterorum nomina consilio relicta.